

Leksyon 6

ANG BAG-O MONG MGA SUKDANAN



**Niining Leksyona Matun-an mo
kini:**

**Kinsa ang Nagapahimutang sa mga
Sukaranan?**

**Asa Mo Man Makita ang mga Suka-
ranan?**

**Unsaon Mo man Pagtuman sa mga
Sukaranan?**

**Ang mga Sukaranan alang sa Kalam-
posan**

**Kinsa ang Nagapahimutang sa mga
Sukaranan?**

Kinsa ang Nagapahimutang sa mga Sukaranan

Diha sa panimalay ang mga ginikanan maoy nagapahimutang sa mga sukaranan sa pagkinabuhi. Ginatudloan nila ang ilang mga anak unsaon pagkinabuhi.

Nagasulti ang Amahan sa iyang mga anak kon unsay ilang mabuhay ug ang dili nila mabuhay.

Sa dili madugay makat-onan sa mga bata ang sukaranan. Kon malapas nila ang mga lagda sa

panimalay, ginabadlong sila sa amahan. Ug kon dili sila motuman mamahimong silotan sila. Bisan ug mga sakop sila sa panimalay, apan ang ilang pagkamasukihon magahatud kanila ug suliran ug kasakit.

Ang langitnon tang Amahan mao ang nagapahimutang sa mga sukaranan nga angay pagabuhaton sa iyang mga anak ug sa mga dili angay pagabuhaton. Usahay ginasilotan usab Niya ang iyang mga anak aron sa pagtudlo kanila sa pagkamaayo ug pagkamatinumanon.

BUHATA KINI

1. Kinsa ang nagapahimutang sa mga sukaranan diha sa ma-ayong panimalay?

- .. .a) ang mga anak
- .. .b) ang mga silingan,
- .. .c) ang mga ginikanan

2. Kinsa ang may katungod sa pagsulti kon unsaon pagkinabuhi sa mga kristohanon?

- .. .a) ang atong Langitnong Amahan
- .. .b) ang katilingban nga atong gipuy-an
- .. .c) kita ra sa atong kaugalingon

Mga Tubag: 1 c) ang mga ginikanan 2. a) ang atong Langitnong Amahan

Asa Mo man Makita ang mga Sukaranan?

Gihan-ay sa Dios diha sa Biblia ang mga balaod sa Kristohanon nga pagkinabuhi. Makita mo kini silang tanan diha sa Biblia ug ilabi pa diha sa Bag-ong Pakigsaad.

Aron nga wala gayuy kalibog kon unsay buot sa Dios nga ipakinabuhi sa iyang mga anak, gi-padala niya ang iyang anak nga si Jesus aron sa pagtudlo kanato ug sa pagpakita kanato sa iyang dalan. Siya mao ang hingpit tang panig-ingnan ug sumbahan alang sa kristohanon nga pagkinabuhi.

Gisaysay ni Jesus ang mga sumbanan sa kristohanon nga pagkinabuhi diha sa "Wali didto sa Bungtod" nga makita mo diha sa Mateo capitulo 5,6 ug 7.

BUHATA KINI

3. Kinsa ang nagahatag sa hingpit nga sumbanan sa maayong kristohanon nga pag-kinabuhi?

- ...a) ang pastor
- ...b) si Jesu Cristo
- ...c) ang uban nga mga kristohanon.

4. Ang "Wali sa Bungtod" makita sa capitulo

- ...a) 5,6 ug 7 sa Mateo
- ...b) 5,6 ug 7 sa Marcos.
- ...c) 5,6 ug 7 sa Juan.

5. Sa "Wall didto sa Bungtod" si Jesus

- ...a) Naghisgut nahitungod sa pagtoo nga makabalhin ug mga bukid.
- ...b) naghisgut mahitungod sa mga bukid nga naglibot sa Jerusalem.
- ...c) nagtudlo sa mga sukaranan sa Kristohanong pagkinabuhi.

Mga tubag: 3. b) Si Jesu Cristo 4. a) 5,6 ug 7 sa Mateo. 5. c) nagtudlo sa mga sukaranan sa Cristohanong pagkinabuhi.

Una sa tanan nagsulti si Jesus mahitungod sa pinasahi nga panalangin nga gihatag sa Dios ngadto sa mga mapainubsanon, sa mga mahigugmaon sa kalinaw ug matitud-anon ug kasingkasing ug kadtong nagabutang sa Dios nga maoy una gayud sa ilang mga kinabuhi ug andam sa pagpakasakit alang sa Ginoo.

Nagtudlo si Jesus kanato sa paghigugma sa atong mga kaaway ug sa pag-ampo alang kanila. Ug sa pagpangayo ug pasaylo sa mga mahiubos kanato . Ang pagtudlo kon unsaon sa pagpakigkauban sa ubang katawhan maoy labing maayo nga mga lagda nga gikahatag nganhi kanato.

BUHATA KINI

- 6. Basaha ang Mateo capitulo 5.
- 7. (Pagpili ug duha sa tubag.) Ingon nga bahin sa sumbanan sa kinabuhi nagtudlo si Jesus nga

- ...a) Magmapinaubsanon.
- ...b) magabutang sa tanang mga butang ug magabuhat sa iyang kabubut-on.
- ...c) manimalos sa mga nagadaut kanimo.
- ...d) magpahimuot sa atong kaugalingon sa tanag nga butang.

8. (Pagpili ug duha sa tubag.) Sa Mateo 5:13, 14 nagatudlo si Jesus nga ang mga anak sa Dios

- ...a) sama sa asin alang sa tanang katawhan.
- ...b) dili gayud masayop.
- ...c) sama sa maanindot nga mga bulak.

9. (Pagpili ug duha sa tubag.) Sa Mateo 5:21-30 nagapasidaan si Jesus batak sa

- ...a) pagpanugal.
- ...b) kasuko ug pagpanimalos
- ...c) dautang mga hunahuna ug pagpanapaw.
- ...d) paghatag sa ikapulo.

10. Sa Mateo 5:43-48 nagsugo si Cristo kanato sa

- ...a) paghigugma lamang sa mga nahigugma kanato.
- ...b) paghigugma sa atong mga kaaway.

Mga Tubag: 7. a) magmapainubsanon b) magbutang sa Dios nga una sa tanang butang ug magabuhat sa iyang kabubut-on. 8. a) sama sa asin alang sa tanang katawhan. c) sama sa suga alang sa tibuok kalibutan. 9. b) kasuko ug pagpanimalos. c) dautang paghunahuna ug pagpanaw. 10. b) paghigugma sa atong mga kaaway.

Naghatag si Jesus kanato sa prinsipyo kon unsaon sa pagtagad sa uban; gitawag kini nato nga "Golden Rule"

"Buhati ang mga tawo sa bisan unsay buot ninyo nga ilang pagabuhaton kaninyo. Mateo 7:12.

Kinahanglan dili kita manghambog, maghinakog, palaaway, o masinawayon sa uban.

Gikinahanglan nga ang una tang pagtagad mao ang pagpahimuot sa Dios ug sa pagbuhat sa kabubut-on niya. Dili kita makahimo sa mga kalibutanong bahandi ingon nga atong tumong sa kinabuhi ug sa samang higayon mag-alagad usab sa Dios. Apan kon atong unahon, siya Iyang tan-awon nga ang tanan natong mga kinahanglan matagbo gayud. Gawas niini ang bisan unsang ginabuhat ta alang kaniya pagagantihan ra niya unya didto sa langit sa iyang bahandi nga magalungtad sa kahangturan.

BUHATA KINI

11. Basaha ang Mateo capitulo 6.
12. Ang prinsipyo nga gitawag ug "Golden Rule" mao ang
- . . .a) pagamit sa bulawan alang sa mga butang nga mapuslanon.
 - . . .b) pagtagad sa uban sama sa ilang pagtagad kanimo.
 - . . .c) pagtagad sa uban sa buot mong buhaton nila nganha kanimo.
13. Sa Mateo 6:19-21, Miingon si Jesus nga kinahanglan magtigum kita sa bahandi
- . . .a) didto sa langit.
 - . . .b) dinhi sa yuta.
- Mga Tubag: 12 c) pagtagad sa uban sa buot mong buhaton nila nganha kanimo
13. a) didto sa langit.

Unsaon Mo man Pagtuman sa mga Sukaranan?

Nasayud si Jesus nga wala gayuy tawo nga makahimo sa pagsunod sa maong kasugoan gawas kon tabangan siya sa Dios. Busa gitudloan niya ang iyang mga disipulo sa pag-ampo ngadto sa ilang Langitnong Amahan aron mangayo ug tabang. Naghatag usab siya kanila ug usa ka sumbanan nga pagampo nga makita sa Mateo 6:9-13.

Labaw sa tanan ang imong Amahan nagpadala sa Iyang Espiritu Santo nga magapuyo diha sa sulod nato ug magatabang kanato. Matun-an mo

ang dugang pa niini sa sunod nga leksyon. Ayaw pagkabalaka nga dili makakinabuhi sa kinabuhi nga ginapaabot sa Dios gikan kanimo. Magatabang Siya kanimo sa matag lakang sa dalan.

BUHATA KINI

14. Naghatag si Cristo ug sumbanan nga pag-ampo nga nagatudlo kanato sa pag-ampo

...a) ngadto sa mga balaan.

...b) ngadto sa atong mga katigulangan.

...c) ngadto sa Dios.

15. Ang sumbanan nga pag-ampo diha sa Mateo 6:9-13 maoy

...a) pag-ampo nga gibuhat ni Cristo didto sa Krus.

...b) usa ka panig-ingnan nga pag-ampo nga naapil sa iyang "Wali didto sa Bungtod"

...c) Pag-ampo ni Cristo didto sa Gethsemane.

16. Basaha ang Mateo capitulo 7.

Mga Tubag: 14. c) ngadto sa Dios. 15. b) usa ka panig-ingnan nga pag-ampo nga naapil sa iyang "Wali didto sa Bungtod."

Mga Sukaranan sa Kalamposan

Gipahibalo kita ni Jesus nga ang iyang ginatudlo maoy mga sukaranan sa malamposon nga kinabuhi. Ang atong kinabuhi sama sa usa ka balay. Ang atong mga hunahuna, mga pulong ug mga pagbuhat maoy tisa sa balay. Samtang

ginapatongpatong sila diha sa patukoranan sa iyang mga pagtulon-an makabaton kitag kinaiya nga makabarug sa bisan unsang mga pagsulay o bagyo sa kinabuhi.

Bisan kinsa nga magkinabuhi sumala sa iyang kaugalingong pagbuot, sa walay pagsunod sa mga sukaranan nga gihatag ni Jesus, mapakyas gayud sama sa usa ka balay nga gitukod diha sa balas ug walay patukoranan. Ug kon buot kang mahimong malamposon nga Kristohanon, tukora ang imong kinabuhi diha kang Cristo ug sunda ang iyang mga sukaranan.

BUHATA KINI

17. Ang tawo nga nagatuman sa mga pagtulun-an ni Cristo ug nagagamit kanila ingon nga maoy sukaranan sa iyang Kristohanon nga pagkinabuhi sama sa

- . . .a) usa ka tawo nga nagatukod sa iyang balay ibabaw sa bato.
- . . .b) usa ka tawo nga nagatukod sa iyang balay diha sa balas.

Tubag: 17. a) usa ka tawo nga nagatukod sa iyang balay ibabaw sa bato.



PASIUNA ALANG SA LEKSYON 7

Kon imong nabati nga dili igo ang pagkahibalo sa sukaranan sa Dios alang sa pagkinabuhi niini ug nagkinahanglan ka ug dugang gahum ug kusog sa pagpuyo sa bag-o mong kinabuhi, andam na ikaw sa pagtuon sa ikapito nga leksyon. Kon ang imong kristohanong kinabuhi ingon sa panlimbasug ug nagaatubang ikaw sa usa ka kahimtang nga nagkinahanglan ka ug makatabang kanimo, ang Leksyon 7 maoy imong gipangita.

Ang ICI nasayud nga nagkinahanglan ka ug linain nga pagpadasig ug pagtabang aron ka makakaplag ug kusog sa pagpuyo sa sukaranan sa Dios nga madaugon, mao nga giansam kining leksyona. Gipadala ni Jesus ang Espiritu Santo sa kalibutan sa pagtabang sa magtotoo! Nasayud si Jesus nga ang pagsulay sa pagpuyo sa kinabuhing kristohanon nga wala ang Espiritu Santo dili gayud mahimo sa tawo. Ang sunod nga leksyon, nga giulohan, "ADUNAKAY MAGTATABANG;" magapahayag unsaon sa Espiritu Santo sa pagpamuhat sulod sa imong kinabuhi ug paghatag kanimo sa kusog sa pagpuyo nga madaugon. Amomg nasiguro nga ang Leksyon 7 daku kaayo ug ikatabang kanimo.

Hinumdumi ang ICI eskuelahan sa imong espirituhanong kinabuhi ug haduol lamang kanimo tungod kay anaa lamang sa Post Office. Ang tabang moabut kanimo inigbalus sa imong sulat. Pagsulat karon sa:

INTERNATIONAL CORRESPONDENCE INSTITUTE

PHILIPPINE NATIONAL OFFICE

P.O. Box 1084

1099 Manila